

ANA ITERANIBA AONON TE BETEBEKE

RONGORONGO NI KAIRIIRI MAN TE AONO

Kabaeaki ibukin Kakabwaia aika Akea Tokiiā Rinanon Ara Berita ma te Uea

Iroun Unimwaane Benjamin Sinjoux

Itingau n aono

"Ba E tangiriia aomata te Atua n te aro are E anga Natina ae te rikitemanna iai, ba e aonga n aki mate ane onimakina, ma e na reke i roua te maiu are aki toki" (Ioane 3:16).

| rangi ni kakaitau iroun Tamara are i Karawa ibukin Ana tangira ae koro-raoi ibukiia natina ni kabane.

Angiina mai ibuakora a rinanon kaangaanga aika a rawawata n te maiu aei. Teuana korakorana mai buakon aikai are ngkana a bua mai irarikira raora aika a tangiraki ioura imwiin ririki aika a mwaiti ni kaai ni uaia ni kukurei. Namakinan aei kanga tiaki te motiraoi mairoun te Atua, ma ni bon koauana, bon kataakin mai-ura mairoun Tamara are i Karawa ae tangiraki are e tangiriira bwa ti na rikirake inanon te onimaki bwa ti aonga n riki n ai arona.

Ara Uea ae Iesu Kristo e kaota Ana kantaninga nakon te burabeti ae Iotebwā Timiti, are e namakina te bwarannano inanon rawawatan ana kaangaanga inanon tekatekana, n ana tai ni kabureaki n te Karabuuti i Liberty.

Ao ngkana ko na teweaki nako nakon te rua, ke nako nanon baia taan tiritiri, ao te motikitaeka nakon te mate e roko nako aom; ngkana ko teweaki nako nanon marawa; ngkana nao aika rang korakora a kaitarako; ngkana ang aika kakamaku a riki bwa am kairirbai; ngkana Karawa e ikota te roo, ao ni kabane bwain Karawa a

ikotaki n tuuka te kawai; ao e moa-moa riki, ngkana mwangain moone e na kaurea wiina n rimwim, ko na ataia, natiu, bwa ni kabane bwaai aikai a anganiko te kataneiai, ao bon ibukin kabwaiam.

"Natin te Aomata e a tia n rinanon ae buakaka riki bwaai akanne ni kabane. Ko kakannato riki nakoina? Mangaia are, taua kawaim, ao te nakoanibonga e na tiku iroum; . . . tai maaka te bwai ae e na karaoia te aomata, bwa te Atua e na mena iroum n aki tootoki" (Reirei ao Berita aika Tabu 122:7-9).

Ni mwanangara n ibuobuoki n ae nako, ti kawara mweengan te buu te mwaane ae e a tia ni motirawa; e a tia ni beku ma te kakaonimaki ngke te tia kairiiri ngaia n te Ekaretia. Kainnabana ae tangiraki e korakora kataakin ana namakin n te aro are e a bua ana onimaki ao nanona n nanako n taromauri; natina a iriira tinaia n aki kakaonimaki. Inanon ikotakira ma te utu aei n rokora ngke e ingabong, n raonaki naba ma naati aine ao tiibu, ti



Unimwaane
Benjamin Sinjoux

kaota ana tangira Tamara are i Karawa ao Iesu Kristo ibukiia ni kabane.

Ti kauringa mwaanera ae tangiraki n ana berita aika tabu ake e a tia ni karoai ngaia ma buuna tabeua te ririki n nako n ana tembora te Uea ae tabu. Ara taeka ni karaunano, e kamatoaa-ki n namakinan rokon te Tamnei ae Raoiroi ao ara tangira ae koaua ibu-kina ngkai ngaira mwaanena inanon te euangkerio, e kimwareirei ma ni kaonaki ana iango ma nanona n ururingakin kabaeakiia ae kakukurei inanon te tembora.

Ara otenanti ao ara berita aika tabu inanon te tembora a rangi n tabu ao bon kabwarabwaraan ana tangira Tamara are i Karawa ibukira. Kakabwaia aika mimitong ake a beritanaki nakoira rinanon berita aika tabu aikai a na bon tii korobukiia ngkana ti teimatoa ni kakaonimaki ni karokoa te toki.

I tibwauaia nakoia te utu anne ae e a tia ni mate kainnabau mai imwaaina, ao I ururingga ni katoa bong. Te bua ae korakora aei bon te kaibangaki

"Mangaia are, tai kua ni karaoan ae raoiroi, bwa kam kawenea aan te mwakuri ae korakora. Ao man bwaai aika uarereke e kaoti te bwai ae korakora.

Nooria, te Uea e kainninoa te nano ao te iango ae tatauraoi; ao naake a tatauraoi ao a ongeaba a na kana raoiroin aban Tion ni boong aika kaitira aikai"

(Reirei ao Berita aika Tabu 64:33-34).

ae N na riai n uouotia ni karokoa are I roko n te maiu are imwiina ma I tibwauaia nakoia au motinnano n reitinko ni beku ibukin au Tia Kamaiu ma nanou ni kabane ni karokoa te toki, n ataia bwa n te bong teuana, N na manga bon kaitibo riki ma kainnabau ae tangiraki ao ti na manga uaia ni maeka ma te kimwareirei ao te kukurei ae akea tokina.

Ngkai ti teimatoa ni ibuobuoki nakoia te utu ae kakateke aei, ti kakoaua bain te Tia Kamaiu n nanonaga ae aroraki, ao ana kakao nakoia bwa a na oki n taromauri ao ni kukurei n ana kakabwaia te euangkerio. I rairaki n taraa temanna ma temanna n te utu aei, ni moanna mairoun te tina, ao n taku:

"Ko butimwaea te kakao aei mairo-un te Tia Kamaiu? Ko kona n roko n te bootaki n toa n te Tabati?"

A butimwaea te kakao ngaia ni kabane. Ngkai ana toro te Uea ae nanorinano, a kaonaki nanora ma te kimwareirei ngkai ti kakoauaia aomata aika a rairinanoia aikai ni waakina mwanekan kawaia n nakon te Tia Kamaiu! I namakinna bwa e kimwareirei Karawa ma ngaira ngkai ti kabaeaki ma ngaiia n tatabemaniia, inanon te kataaki ao n te onimaki.

Tiaki tii karaoakin berita aika tabu, ma te teimatoa n ongotaeka nako iai e kabaeira ma raora aika a tangiraki. Korakoran mwaakan ana Mwakuri ni Kamaiu ara Tia Kamaiu ao n reitinako ni kanuaaki man ara onimaki rinanon te tataro, kamatebwaiian booki aika tabu ao te mwakuri n ibuobuoki a na anganiiira te korakora are ti kainnanoia ni kitarai ni kabane kaangaangan te maiu.

Ara Tia Kamaiu e bon tabeaianga ibukiia naake a karawawataaki. E bon teimatoa n arora baina n nanonaga ao ana tangira. I kaoia ni kabane ake a

kaitara ma kaangaanga inanon maiuia, bwa tao aekakira, bwa a na nakon te Tia Kamaiu ao ni kakukureia n ana amwarake ake n Ana taibora ngkai ko butimwaea ana toa ni katoa Tabati, ao ni karaoi ao ni kawakin am berita inanon Ana tembora ae tabu. Ngkana ko karaoa aei, bon am bwai te berita ane imwiina:

"Mangaia are, tai kua ni karaoan ae raoiroi, bwa kam kawenea aan te mwakuri ae korakora. Ao man bwaai aika uarereke e kaoti te bwai ae korakora. Nooria, te Uea e kainnanoa te nano ao te iango ae tatauraoi; ao

naake a tatauraoi ao a ongeaba a na kana raoiroin aban Tion ni boong aika kaitira aikai" (Reirei ao Berita aika Tabu 64:33-34).

I kakoaua bwa berita ake ti karaoi n te bwabetito, ngkana ti kareke te nakoaniobonga ae tabu, ao otenanti akanne ake a kakoroakibukiia inanon te tembora, a kabaeaki ma Kakabwaia aika korakora ake e tatauraoi te Uea ibukira. Rinanon ara kakaonimaki n ongeaba nakon berita akanne ngkai ti teimatoa ni karokoa te toki, ti na karekei ana kakabwaia ni kabane te Uea, n aran ara Uea Iesu, amen. ■

ANA ITERANIBA TE AONO

Te Beretitenti i Kiribati e Butimwaaia Taan Kairiiri mai Aon Aba

Te ruu ni kaongoraa

Nte boowi ni kataneiai ae nako ibukiia taan kairiiri n Ana Ekaretia Iesu Kristo ibukiia Aika Itiaki ni Boong aika Kaitira man te Ribwabiriki mai Kiribati, te tia kairiiri ibukin te aba, Beretitenti Taneti Maamau, e kaota ana kakaitau ae moan te korakora ibukin ana kakairi ae rangi n tamaroa te Ekaretia ma ana membwa.

E kaota uaan ana mwakuri te Ekaretia iaon te kamarurung, te reirei ao mwakuri n ibuobuoki ibukin te botanaomata. Te wekitiaobu anne bon tenibong te bong taina ibukin kataneiakiia taan kairiiri man te Marshall Islands/Kiribati Mition ibukin te Ekaretia, e karaoaki ni kautuun te aba ae Tarawa. A roko taan kairiiri man te mwaiiti ae 14 man ana bootaki

n taromauri te aro man aban Kiribati ake iaon aba.

Beretitenti John Larkin, te Beretitenti n te Mition, e butimwaiia 51 ake a roko man aia anganano ni beku n taian nakoia aika a kakaokoro inanon ana bootaki n taromauri te aro.

E kaira te marooro-ae boboto iaon te kataneiai iaon tabeia mitinare aika a bwanin aia tai n reireinakiia aomata taekan te Ekaretia ao boutokakiia membwa ake a okira te aro. E katurutrua naba tabeia membwa ni buokakiia rao ao kaain rarikiia n reiakina taekan ana Euangkerio Iesu Kristo.

Iotua Tune, te Moan Kauntira n te beretitentii n te mition, ao te tia kairiiri n te Titeiki n te aba ao ni bootaki nako e tatauraoi naba marooro-ake a



boboto iaon kataneiakiia taan kairiiri.

Atuun marooro n raonaki ma te mwakuri n ibuobuoki, kauntira ni mwaanga aika a nakoraoi, karaon otenanti n te nakoanibonga, rekooti ibukin taekan te mwane ao kaainakin te aro, te katauraoi nakon te tembora, te katauraoi ibukin te mitinare ao te maiu n toronibwai. Iai naba te bwabwaro ae karaoaki iaon te kamarurung ae te itera-ni bong taina ni marooroakina aron katokan te aoraki ae te tioka, unikan uanikai aika a riki iantano ao kuukanakin amwarake aika a kamarurung.

Unimwaane ao Titita Skibbe, te taanga ni mitinare ibukin buokan kainnanoia te botanaomata, a anga baia ni katauraoi ni karaon nanon taian kaetieti ao kataneiai. N raonaki ma anne, ngkai bon te neeti ae beeба iaon te aoraki ae te tioka, Titita Skibbe e karaoa te tutuo ao n tuoi raraaia ake a roko n tatabemaniia nako ao n anga ana taeka iaon maiuakinan te maiu ae kamarurung.

Te mataniwi n te Moroni High School, Banririe Nenebwati, e barongai kainibaire ibukin te roko ao waakin te karinrin ibukiia ataein te reirei ake a maeka iaon aba. N te tai aei ao te reirei e boutokaia ae e riaon 700 ataein te reirei, are man te mwaiti ake a roko n tei ibukin 14 aaba ake a ira te wekitiaobu.

Tabeman manatia ao taan mwakuri n te Ekaretia man te Kiribati Service Centre a anga naba aia rongorongo iaon te atatai ae tau ibukin ana auti ni

bootaki te Ekaretia, n aron babairean te kataumwane ao bwaai ake a ootanaki.

N aron ae ngkai iai 22,000 membwa n te Ekaretia i Kiribati (21 te batienti man ikotan mwaitin te botanaomata), inanon uoua te Titeiki ao uoua te mwakoro. Iai naba ae riaon 100 mwaitiia mitinare ake a beku i Kiribati.

Te Ribwabiriki mai Kiribati ni karinanna ae ngkai ai bon te kaonoua n te aonaaba ni kaineti ma mwaitiia membwa n te Ekaretia ni katoa aomata nako. ■

Bibitakin-ana Tabo n Takakaro te Aba ae Kiritimati

Te ruu ni kaongora

Te Kiritimati Island District n Ana Ekaretia Iesu Kristo ibukiia Aika Itiaki ni Boong aika Kaitira e kauka ana tabo n takakaro ae kabonganaki n anga aika a mwaiti n te tai ae nako, are e raonaki ma te tabo ni kaboo n te takakaro ae te bwatiketiboro aoe te nete.

Te kateitei ibukin te tabo n takakaro iai naba ana taura aika e katauraoi ni kaonoti ibukin kamanenaakin te tabo n takakaro ni karokoa te bong

ao bwaai tabeua aika a riki aika katein te aba.

Ni kaukan te bukamaru e kairaki ma katein mwaieen Kiribati ao te katokabau (ana bukamaru Kiribati ni katokaan te bau) ni butimwaaia taan kairiiri n te Ekaretia ao taan kairiiri n te komuniti.

Ake a tei ibukin te Ekaretia bon Beretitenti John Larkin, te Beretitenti n te Marshall Islands/Kiribati Mition ma kainnabana ae Titita Robyn Larkin;

Unimwaane ao Titita Menzie, taanga ni mitinare aika a maan ake a beku ngkai iaon Kiritimati (Unimwaane Menzie ngaia naba te ka 2 ni Kauntira n te beretitentii n te mition); ao Teitiaki Naitiniwa, te Beretitenti n te Kiritimati Island District.

Beretitenti Larkin e katauraoa ana marooro ni kaukuuki nakoia iruwaa ake a roko ao membwa aika mwaiti man te Ekaretia—ao n taekina ana motinnano te Ekaretia ni katean taian



kateitei bwa mwakoron baika e na karikirakei te Ekaretiia ibukin kamarurungan te rabwata ao te reitaki ni iwawaaki ma membwa—n ai aron naba katauraaoan te tabo ibukin waaki ni kakukurei ni katein te aba ao n te aro ni bobootaki.

Te Tia Tei ae Karineaki ae Mikarite Temari, te Minita ibukin te Aono n Raina ao Rawaki e katauraoa te marooro ni butimwaai n tei ibukiia kaain te

tautaeka ni Kiribati ao ni kaota ana kakaitau ibukin nakoraoin ao mwakurin raoi ana kateitei te Ekaretiia iaon Kiritimati, n raonaki ma te tabo n takakaro ae boou.

Te Minita ae Temari e kaota naba bonganan ana angabwai Ana Ekaretiia Iesu Kristo ibukiia Aika Itiaki ni Boong aika Kaitira nakoia aomata ni kabuta te Ribwabiriki mai Kiribati

Te tabo n takakaro ae boou e a kaman baireaki bwa te tabo ni kata-neiai ibukiia taan tei ibukiia kaain te tiim ni bwatiketiboro ao n nete n ana Kaboo n Takakaro Kiribati Inanon te Aba ae e nang roko are e a tia ni baireaki taina rimwi riki n 2019.

N raonaki ma anne, te tabo n takakaro e na butimwaai kaboo n takakaro iaon te bwatiketiboro ao te nete ibukiia kaain te komuniti. ■

Te Tai ae Taiaki ae Kakukurei

Iroun Tessa Dewsbury

Tarawa, kautuun te Aba ae Kiribati, e toka iaon te ane man taraakina

ae tamaraoa ao e mena irarikin te ekuetoa ni Marawan te Betebeke.

Te aba ae riki man 32 aba ake a riki man te ane ao teuana n aba ae mena ieta ae riki man te rakai. Tabeua mai buakon aaba aikai a mena n taabo aika a raroa nako ni kaineta Biti n teuana te kawai, ao Hawaii n te kawai are teuana.

E kona ni matoatoa te maiu ibukiia 114,300 aomata ake a maeka i Kiribati ma buruun karawa ae takia ootana ae nooraki koauana e kuri ni katoabong, ma bwakan te karau ae tokitoki ao ae bon tau ibukin kateimatoaan te maiu. Ma, te tai ae taiaki ae riaon tabeua te ririki n nako e rangi n nakoraoi—are bon taiakin te maiu n tamnei. N 2017, 804 aomata a nakomai nakon Kristo ao ni bwabetitoaki nakon Ana Ekaretiia Iesu Kristo ibukiia Aika Itiaki ni Boong aika Kaitira; are e karekea botan te mwaiti ni kaainakin te aro nakon 19,790 inanon 2017. A mwakuri mitinare ni katoa bong ni kaoia aomata ni kabane n “Nakomai nakon Kristo” ao n 2017 te rikirake e teimatoa ni korakora. ■



Aia Koaua te Moanrinan ao te Rororrikirake man te Uoote ae Eita 2

Iroun Tessa Dewsbury

Te Uoote ae Eita 2 e onrake kaaina irouia ataein te Moanrinan aika niniwana ao te Rororrikirake. Aikai tabeua mai buakon aia koaua aika korakora ibukin kawakinan te bong ae te Tabati n tabuia.



Toromon, 9 ana ririki

"I kan roroko n Taromauri n te Tabati ibukina bwa I konaa n ongora te reirei ao ni karekei kakabwaia man te euangkerio —ao I kukurei ni kana te toa."



Mary, 12 ana ririki

"I kawakina ana bong te Uea n tabuia n roroko n taromauri ao ni kawakina te rau inanon mweengau."



Atanimwane, 8 ana ririki

"I kaotia nakoia raorau ae Ngai natin te Atua ni kataia ni kawakina te Tabati n tabuia. I ataia bwa e tangirai Tamau are i Karawa."



Enos, 11 ana ririki

"I ataia bwa e tangirai Tamau are i Karawa ibukina bwa e anganai maiu ao au utu ae kakateke."



Orebwa, 13 ana ririki

"I kataia n kawakina te bong ae te Tabati n tabuia man warekan booki aika tabu ao n rooroko n taromauri ao ni kana te toa."



Maawa, 17 ana ririki

Maawa e tangira te kakabwaia ibukin te Tabati: "Te Tabati bon te bong ae kakukurei—I kukurei n taian reirei man te kiraati ao n namakina te Tamnei ae Raoi."



Kaakee, 13 ana ririki

"I tangiri'i taian anene n taromauri ao anenen te Ekaretia ibukina bwa I konaa n reiakina reirein te euangkerio mai iai." ■

Mwakuri n Anganano ibukin te Kouwii i Kiribati

Iroun Tessa Dewsbury

I bukin 15 te ririki Taokita Wayne Chisholm mai Monroe, Utah e kaoiia taan anganano mai Aotiteria, Tonga ao USA ni katauraoi mwakuri n ibuobuoki n te Kouwii ibukiia ataein te reirei, taan mwakuri, ao taan reirei n te Moroni High School ao mitinare Ibukiia Aika Itiaki.



Taokita Clyde Larsen e mwakuri n te kiriniki ni kouwii ibukiia te botanaomata i Abaiang



Mwakuri n ibuobuoki, bwaai aika a katauraoaki ma bwaai ni mwakuri a bane n reke man te anganano ao a tauraoi ibukin teniuia te wiiki ni moan te riri.

Mwiina ae riki e bon kakawaki ni kakerikaakan aorakin te wii ao ni karikirakean tuan te aitiin ni kaeti ma te wii.

Taokita Chisholm e kaira kate-an taian kiriniki aika a teimaan n te Pasanga High School i Apia, Samoa, ao n te Liahona High School i Tonga.

N aban Kiribati ae mena iaon aba ae Abaiang, mwakuri n ibuobuoki n te Kouwii ibukin te botanaomata a karao-aki n te aro ae te Katorika inanon uoua te wiiki n Tianuare iroun Clyde Larsen.

Inanon te tai anne tao bon nakon 800 taian wii ae a tia ni koutaki, 350 n iterana ake mai tinaniku a tia ni kaitiakaki ao ni katararaoaki, ao 600 ataein te reirei ae a reireinaki aron tuan te aitiin ao n anganaki aia bwain aoraki inanon kaawan reirei ni kabane; a kawaraki taabo n reirei n te rebwrebwe.

A aki kaangaanga karaoan bwaai iaon Abaiang. Mitinare aika a bwanin-aia tai aika Titita Sillito ao Titita Robison ao Unimwaane Weenig ao Unimwaane Sanf a ibuobuoki ngkana a tauraoi, a mwakuri 10–12 te aoa n te bongina, onoua te bong n te wiiki n akea te motirawa. Taokita Larsen e kabwarabwara aron kainnanoan te kouwii ikekei kanga “e kateinang karaoana”, ma n taekinna bwa a rangi n akoi man tataonaki n nano kaain te aba—a karauia n tekateka iaon te inaai inanon mwaitin te aoa n tataninga aia tai bwa a aonga n nooraki.

E taku: “E kakoauaki bain te Atua tiaki ni katoa bong ma ni kabane boong. Bon te tibwanga ae kakukurei n riki bwa te bwai ni mwakuri ni bain te Atua ibukiia aomata aikai—te tibwanga aei e bon aki manrereaki irouia ake taan anganano.” ■





Tabiteuea Branch



Tabiteuea South Branch

Birimwaakan Rikiraken te Ekaretia i Kiribati

Te ruu ni kaongoraa

Ni moan namwakaina aika aua n 2019, nimaua ana mwaanga Ana Ekaretia Nlesu Kristo ibukiia Aika Itiaki ni Boong aika Kaitira aika a kateaki iaon aba n Aban Kiribati, ni kaineti ma are e taku Beretitenti John Larkin man te Marshall Islands/Kiribati Mition.

A kateaki mwaanga aika a boou iaon te aba ae Nikunau, Nonouti ao Onotoa; ao uoua mwaanga aika a boou ake a tia ni kateaki iaon Tabiteuea.

N raonaki ma uoua mwaanga aika a boou iaon Tabiteuea, iai ngkai botan te mwaiti ae aua ana mwaanga te Ekaretia n te aba anne.

Rinanon aia mwakuri korakora 100 mitinare aika tauraoi ake a beku i Kiribati n raonaki ma aia mwakuri n ibuobuoki ae kakaonimaki membwa n te Ekaretia n te aba, e rikirake ni birimwaaka te Ekaretia i Kiribati.

Ni kaineti ma are e taku Beretitenti Larkin te babaire bon kurubunakin nimaua mwaanga aika a boou aika a tibwa tia n tei ma mwaanga aika maiu iaon te aba ae Tabiteuea ao Beru ni katea te South Tarawa District bwa te mwaneka are imwiina ni katean te titeiki ae boou. ■



Nikunau Branch



Nonouti Branch

Kakukurein Taai aika a na Roko ibukiia Au Utu

Eute Kareketaake

Karekean te kataneiai n te mwakuri ao n te maiu n tamnei rinanon te Pathway Programme.

Arau bon Eute Kareketaake. Bon 24 au ririki ao au kouru bwa I kan riki bwa te tia mwakuri ae mwaatai ibukin kamweeraoaia aomata. I rinanon te moan ibuobuoki n tangira ao n tararua ibukin kamweeraoaia aomata n te kaangaanga are I rinanona inanon maiu ao man te tai anne iai au kantaninga nakon te nakoa anne.

Ngke ti uarereke Ngai ma tariu ao ti a kamwanangaaki nakon te United States bwa ti na maeka iroun aitinau ao n nako n reirei. Ti kakaitau n reken te tai ae tamaroa ibukin te reirei, ma e aki tararuaira raoi aitinau. N te tai teuana ae riki ao e nako ni motirawa aitinau ao ni kitaini ma tariu ni katikuira n tii ngaira n te auti. Iai ae e na bae n tuoira ni katoa bong, bwa ti bon rangi n ataei ao ti maaku n tiku i bon iroura.

E nakobuaka au tai bwa e aki kona n reke matu n te tairiki ao ngkana I a matu n te kiraati e titiraki te tia reirei bwa bukin tera ngkai I rangi ni kua. Akea au iango ae ara kaangaanga anne e bon aki butimwaeaki ao n tounako n aron aia waaki nakon au kaeka. Ngai ma tariu ti intawiunaki irouia taan mwakuri ibukin kamweeraoaia aomata ao I namakina nanoia ibukin aia mwakuri ao nanoia ae koaua ni kan buokiira. I tangiria ni kan riki n ai aroia ao ni buokiia ataei



n ai arora n te aro n tangira naba are a tia ni karaoia. Te nano n tangira anne e aki kona n nako mairou.

Au kaangaanga n te US bon tiaki te tai ae korakora ibukin te reirei n aron ae e na bon riai, ma te Atua e mwakuri ni kawai aika a kamiimi ao te bwai are I rinanona e kairai bwa N na kakaea te bwai are I nano iai inanon maiu. N anne I reitinako ni kekeiaki n riki bwa te tia mwakuri ibukin kamweeraoaia aomata, te kawai nakon te kouru aei e aki bebete; n taai tabetai e reke te namakin ae kaangaanga. I a tia n reiakinna, e ngae n anne, bwa Tamara are i Karawa e atai nanora are ti tangiri ao iai ana babaire ibukira ni kabane.

Inanon 2017 I mare ma kainnabau ae bane ana tai ni mitinare ibukin ana Ekaretia Iesu Kristo ibukiia Aika Itiaki ni Boong aika Kaitira. Imwiin te bwai are I a tia n rinanona ae tabu are e kamatoaa nakoui te tamnei bwa e koaua te euangkerio, I a bwabetitoaki.

Kunean te euangkerio bon te mwaneka ae bubura nakon kakoroan nanon au kouru ibukin te reirei. Te Ekaretia e ataa kakawakin te reirei n aron naba ae I karaoia ao e a tia ni katauraoa te boutoka ae mwaiti n aron te "Pathway" programme, are e a kona ni kareke te anga ibukiia aomata ni kabane inanon kaangaanga nako ibukin karekean te reirei. E bon aki bebete te kawai, ma I a tia n reiakinaki bwa ngkana e a tia te Atua n anga te tua nakoia Natina, E na katauraoi

kawai n taainako ni kauoua n te mwakuri ao n te maiu n tamnei.

Te Pathway programme bon te mwakuri ae e na katoka au kaanganga nakon nanou are I tangiria ni karekean au reirei ao e a tia n anganai ma kainnabau baika a mwaiti nakon ae tii te tibwanga ni karababai ara reirei. Ti a tia n reiakinia taekan te maiu n toronibwai ao te reitaki ni utu ae kakukurei, ibuakon tabeua konabwai aika a kakawaki inanon te maiu.

N ai aron naba katauraoan te Pathway programme, e a tia te Uea ni kaoniira ma Mwaakana ao Tamneina.

Ti namakina rikiraken ara onimaki. I namakina te ninikoria ae kamiimi ae roko irou ngke e a boo au tai n tei imataia taan ira te reirei n te Pathway ao n taetae. Ngai ma kainnabau ti namakina rikiraken korakorara ao ara konabwai ni bairea raoi ara tai ao ni mwakuri korakora bwa ti aonga ni katiai mwioko ake ti anganaki.

Kaainakin te pathway bon te baire ae matoatoa ni karaoakina. Akea ara laptop ao akea angara n toma ma te Wi-Fi inanon mweengara. N aki tabe ma baike akea iroura ti a tia namakina bain te Atua inanon mwanangara, n anganiira kakai aika a uarereke ao aika a bubura inanon kawaira n aron reken taabo tabeua ni karaoa ara mwakuri, ke membwa ake a nooriira inanon kawaira ae abwabwaki nakon te tabo n tangoboki ao n nikiriira n te kaa.

I tangiria bwa e na kakukurei ara boong aika a na roko ibukiia au utu. I ataia bwa ni kamwaitan riki te reirei e na angan au utu aia tai n tokanikai ao ni maiu n toronibwai. I ataia bwa Tamara are i Karawa, Iesu Kristo ao te Tamnei ae Raoiroi a tia ni memena irrikira inanon mwanangara ao n tia ni katokii rawawatara ma ni kabebetei. ■

ITERANIBA N TE TABO

Am Iteraniba n te tabo e katauraoaki irouia kaain te ekaretia n oin ami tabo iaan ana kairiiri te Beretitentii n te Aono bwa e aonga n taekinaki iai kainnanoia ao aia mwakuri kaain te ekaretia n te tabo ae ko maeka iai. Karinakin iteraniba n te tabo ni katoa baan te beeба ni kaongora e nakon tauraoin kanoana man te tabo. Ti kaoi ngkami bwa kam na tibwauai ami onimaki ni karikirakei iango ao mwakuri man kawaran am eteta n ami tabo n te:

liahona-pacific@ChurchofJesusChrist.org ■